

COMUNICATO n. 3449 del 19/11/2025

Ma makse innschraim åhevante von 27 von bintmånat un sin atz 9 von hoachnach 2026

A schualdjar in auzlånt in lentar auz vodar Européan Uniong: ågenump di kritèrie zo geba di schütz

[Cimbro] Da provintziàl Djunta hatt ågenump in auzschraib zuarzogebe schütz zo giana zo studjara in auzlånt in lentar auz vodar Européan Uniong. 'Z iz an initziatìf augelekk vor di studjént un di studjénten von draite djar vodar obarschual odar von zboate von sèlln obarschualn boda innhaltn lai viar djar, boda bölln machan a halbez odar a gântzez schualdjar in auzlånt.

“Disa initziatìf gântz gezalt pitt provintziàl gèlt steat in gântzan drinn in ünsar stratedjì vor di istrutziung. Bar bölln stercharn di zung kompetentzan von studjént ombrómm bar gloam ke azma sait guat zo konfrontarase pitt realtét un kultùrn vodar gântzan bèlt gèttma an groazan vèrt dar kulturàl identitét von Trentino sèlbart. In da gelaichege zait böllbar auhaltn un schupfan zo macha formatif esperientzan in auzlånt, grüntlich zo macha krescharn un auzonemma kompetentzan nützlich vor di bèlt vodar arbat” asó hatta khött di asesören vor di Istrutziung Francesca Gerosa.

VOR BEM

'Z mangda nemmen toal di studjént boda:

- gian in ditza schualdjar 2025/2026 in da zboate klasse von obar schualn boda innhaltn viar djar odar in da draite klasse von åndarn obarschualn boda innhaltn vümf djar;
- **boda hãm mindar baz 20 djar in lest tage guat innzomaga gem di vorsch;**
- boda hãm soìn vonsitz in Trentino;
- boda, azpe ekonòmesche livèll, gehöarn inar famildja pittnan ICEF “Famildja” boda auzkhint von sèll boda khint gebunnt un von sèll boma hatt in djar 2024, geroatet åhevante von 15 von herbestmånat 2025, gelaich odar mindar baz 0,83.

BO

A schualdjar in a lånt auz vodar Européan Uniong.

INNHALT

Ma mage nemmen toal vor a gântzez schauldjar (daz mindarste 240 tang) odar vor a halbez (daz mindarste 110 tang).

BIA INNZOGEBA DI VORSCH

Di vorsch zo haba in schütz bart mochan khemmen inngètt, lai durch di protzedùr online, **vo di zene mòrgas von fintzta 27 bintmånat 2025 sin mittartage un halbez von vraita 09 hoachnach 2026** garade vodar websait: www.provincia.tn.it.

Dar schütz zuargètt iz allz ummaz gepuntet zo macha verte 'z schualdjar 2025/2026 åna zo haba formatif schulln.

'Z gèlt untargelekk servìrt zo zala bazta khint gezért zo herbega di studjént in auzlânt, anvétze zornìrn baz vor schual zo giana zo macha steat zuar in studjéntn un soinen famildje. Di schütz boda bartn khemmen zuargètt bèksln nà in belz auzlânt ma geat zo studjara un vor biavl ziait (a gântzez schauldajr odar a halbez) un bettana ICEF "Famildja" ma hatt.

In gântzan soinda khent untargelekk 500.000,00 euro boda zuargem zo zala schiar vüchtzek schütz studjo.

Zo haba pezzarne informatzionen dar auzschraib Extra EU venntmen afte websait: www.provincia.tn.it .

Übersetzt von Schaltarle vor di zung von Toalkamou vodar Zimbar Hoachebene

(cdt)